

龍

江

集

龍江集卷之八

雲間 唐錦 士綱

墓誌銘

江西右叅議辛酉儲公墓誌銘

嗚呼吾友朝列大夫江藩叅議辛酉儲公之卒也  
又不克葬越八載爲嘉靖丙午其壻潘子允亮憲  
副笠江先生子也傷之爲飭兆域築玄堂卜以明  
年丁未新正廿日癸酉葬公於三林莊之舊丘復  
懼公之盛美弗傳乃奉庠友潘君時雨所具事狀  
謁予請銘嗚呼公平生知厚茲唯錦存銘其敢辭

按狀公諱昱字麗中莘西其別號先世魏人也遠祖官二公宋季避亂徙居三林莊之莘溪元至元間建設海邑子孫遂爲邑人曾祖諱德富祖諱敬考諱璇以公貴贈兵科右給事中隱德相承世業耕讀妣趙氏贈孺人公生有俊質穎敏絕人五歲失恃繼母孫孺人撫育甚至教之書應口成誦甫就外傳卽知趨學日誦數千言過目不忘賦詩輒有奇句見者嗟異稍長益該貫博洽造詣日深文筆雄奇豪贍宗法韓蘇而精嚴峻潔又自有獨得之妙焉憲臺校業屢居首選弱冠廩食士林以倫

魁擬之郡守陳公劉公邑令董公咸加殊接延爲  
子師里中子弟執經問義者戶外之屨恒滿凡六  
舉鄉試皆弗偶正德戊辰遂以例貢太學錦之年  
友甌濱王公爲司成師道甚飭精藻鑑尤慎許可  
試公文大喜稱爲國士錦時待罪諫垣每朝會甌  
濱必舉似錦曰儲生翰林選也四方之士聞而慕  
焉從之講易者數十人太宰水村陸公嘗問士於  
甌濱首以公對水村卽日遣子受業廟堂諸元老  
咸相傾注會外艱計至竟以憂歸癸酉服闋還太  
學遂登順天鄉薦丁丑會試南宮占上第選入翰

林爲庶吉士讀中秘書館閣試恒在優列己卯冬  
諸吉士散館公拜禮科給事中俄膺簡命監營  
乾清官時工費侈濫奸蠹萬狀公釐正裁革悉  
歸於理侵冒之徒無敢則迹其間所節省亡慮數  
十萬雖觸忤權倖弗暇恤也嘗有奸商持千金爲  
賂公怒而斥之同事者服其廉比訖工擬進公太  
僕少卿公抗疏辭曰懋賞朝廷之殊恩服勤臣  
子之常職以常職而冒濫殊恩匪惟有覆餗刑渥  
之凶抑恐開獵資倖榮之路不便上允其請特  
有白金文綺之賜尋轉兵科右給事中公益感益

奮知無不言封駁建白皆有開國體多見允行舉  
劾鉅重必奮筆直前不少依違雖一時風采四方  
聳動而忌者怨者亦不勝其衆矣又二載禮曹薦  
充副使冊封 弋陽王於豫章事竣還 朝道聞  
少參之命公憮然曰吾久淹塲屋晚獲遭際雖嘗  
展効微勞而績緒未究遽荷金緋之榮亦云幸矣  
其敢忘止足之戒乎遂三疏乞休乃於三林里第  
累山鑿沼鼎建亭榭鳴琴賦詩優游靜養殆若忘  
世者然久之頗以離索爲歉復營新居於邑治之  
北時時欵集賢士大夫與爲文會品隲古今折衷

疑義每至丙夜未已高談劇論往往抵掌絕倒又  
若有意於斯世者焉戊戌秋復還三林山居忽寢  
疾逾時自度生育無望擇立從子鵬爲嗣俾王舊  
第公仍就新居訪醫藥雖攝療百方竟不能起屬  
續之辰季冬望前三日也距生成化戊子仲春十  
有二日享年七十配徐氏贈孺人繼李氏女四長  
適福州知府朱豹次適曹恪皆先公卒又次所適  
卽允亮也季適王慈鵬後公三載亦卒鵬子一誠  
一中鳴呼公文學足以名世德器節操足以表俗  
其所建樹雖未獲盡究所蘊而嘉謨懿論日徹

聖聰顯列典章澤流區宇古之所謂三不朽者蓋  
兼得矣矧年躋古稀順正而斃復何憾哉第盛德  
弗嗣或以致疑於天豈知適然之數達觀者固未  
始以置懷抱也錦憶童子時與公同遊庠校當時  
同舍聚講者數輩皆一時英雋而公尤挺卓錦稚  
且闇偶先忝科第後二十餘載公始登科雖騰發  
較晚而鴻名偉烈輝赫炳錦蓋瞠乎其後矣晚  
同投老林壑白首追隨尤以舊誼特相契密則世  
之知公者孰有踰於錦耶遂爲之銘曰 光風霽  
月公之風神虹光霞彩公之遺文排雲披腹公志



既伸天章綸錦著公之勲孰謂公已公則永存乃弗胤績匪公之忤數有適然寧所較論我我堂封萬古恒新過者式車曰此名諫議之墳

四川左布政使西津沈公墓誌銘

嘉靖己亥冬封宜人張氏卜以十二月七日葬其夫方伯西津公於長涇之先塋公之從弟典膳君升甫預遣從子希周暨其子希臯詣予徵銘希臯撰公事狀甚悉嗚呼予弱冠時與公同就臺試同領鄉薦又同 賜對於大廷自是踐履中外歷弘治正德以迄嘉靖之初復相繼歸休則相知相信

宜莫深於予矣銘何可辭按狀公姓沈氏諱恩字  
仁甫西津乃其別號先世居嘉禾之楓涇元季時  
有諱居仁者避兵而遷遂占籍上海之磊塘里居  
仁子諱德弘是爲公之高祖始遷居邑城德弘子  
諱晟晟子諱環號梅月公之曾祖祖也考諱鉉號  
松雲翁世德相承隱居不仕松雲翁前室談氏蚤  
卒繼娶於謝乃生公焉公自少穎敏秀特動止不  
凡予伯考拙菴中丞公見之矍然曰此子風骨清  
奇異時名位何減於我許以孫女妻之稍長遊邑  
庠造詣益深文名欻起按部校業者恒加稱賞遂

領南畿乙卯鄉薦明年丙辰試春官復登上第時  
年二十有五松雲翁喜甚亟走京師視之朝士羣  
賀翁笑曰吾家德積累世未嘗有顯者乃今發於  
吾子吾志願畢矣留月餘竟歸是歲之冬翁寢疾  
不起計聞京邸公哀號幾絕匍匐南奔抵家寢苦  
枕塊毀瘁骨立杜門讀禮鄉人罕覲其面終三載  
猶一日也服闋赴銓拜刑部主事訊鞠明審大司  
寇以下咸稱其能三載考績 敕贈松雲翁如其  
官謝氏封太安人又歲餘進貢外郎賢聲益著時  
太安人祿養京師幾五載矣忽有鄉土之思先公

而返公不勝思慕明年卽援例歸省暨還朝復奉  
太安人以行會逆瑾竊權紊政羅織縉紳誣公愆  
於制限勒令解任公歸時環堵蕭然居之晏如閉  
門掃軌唯肆力於問學自經史以至諸子百家靡  
不精探熟誦士林推其博洽正德庚午秋八月瑾  
敗伏法 詔錄諸臣之遭瑾誣黜者於是起公工  
部員外郎俄轉郎中復改刑部有富僧名古燈者  
坐法應死厚賄巨璫援之甚力公奮筆成獄時論  
偉焉尋擢陝西按察副使逾年銓司聞其風力薦  
改郾延兵備憲度嚴明一道肅然撫按鄧公藍公

聯疏旌之進雲南按察使公既精練法比又掌風紀之司於是懲貪殘雪冤滯風采爲之一新嘗有邊官犯重辟賂結權倖爲求脫死公不爲撓沮執之彌堅侍御唐公龍亢相器重列其風績專牘舉薦遂遷四川右布政使公得堂咨卽單車就道囊無長物人謂有古廉吏之風公素知蜀邊轉餉之艱民尤憚苦至卽議徵折色十分之六歲省浮費約七十餘萬疲困者頓獲蘇息白水驚寇數千哨聚攻刼公適分守其地建策剿平數邑賴以保全辛巳三月轉左使公以任專責重益殫心力凡可

以節財裕民雖怨謗叢集不以爲憚時尚沿逆瑾  
牟漁之例徵解諸司歲派倍昂其估公按制削汰  
幾損其半王府及諸權貴每因修建瑩宇過邀夫  
價鎮守中官隨事科擾莫敢誰何公一一裁抑皆  
不得逞三載間凡節省民財二百餘萬積公帑者  
四十餘萬迄今蜀人歎頌不忘 詔採大木公綜  
理有方民不擾而事集晉太憲臣陳黎二公旌列  
勞績 聖上有白金文綺之賜都御史胡公世寧  
許公庭光相繼撫蜀皆特疏薦揚胡謂公卓爲一  
時之彥許謂綽有統馭之才指事具績極詞褒贊

聞者咸以爲允時有權勢之家私役官夫過濫又有擅據官舍及乾沒官物以規厚利者公憤其蠹國病民峻加釐革雖萬口稱快而權勢家憾愈深矣遂相與騰謗中傷公嘿然不辨而歸然矜恤民隱不忘于懷有司政令或有未善輒輦蹙不寧思所以救正之唯其亮直無黨人亦不以爲忤囊無贏貲而急義樂施篤於宗黨凡族人不能婚葬與不能贍給者必委曲賙卹殆忘其力之不及也冢宰汪公鉉侍御唐公愈賢與公素昧平生每爲海內稱屈者三人公居論首廷議方欲起之而公

不逮矣嗚呼惜哉公負英特之才卓越之識而輔以剛正之氣使究所蘊顯功殊勲非所難致顧以中遭忌沮弗竟厥施迨夫易簣之際貧無以殮乃至稱貸於人行道者聞之莫不咨嗟慨歎爲之扼腕矧吾黨之士哉悲夫公生成化壬辰六月九日卒於嘉靖癸巳九月二十五日享年六十有二平生雅好續文詩工古選所著有獻餘忠浦雲亭稿藏于家先娶唐氏卽中丞公之孫女初封安人加贈宜人繼娶卽張宜人同郡樂清公之女嗣子希尹尚幼女七長適刑部司務孫黃溪子太學生繼



臣次適按察副使張世祥子庠生寶臣皆唐出次  
適太學生戚海隅子兆陽次適例授千戶喬大康  
子承宗皆側室殷出次室太學生顧東川子從仁  
次贅大理少卿常熟吳虞東子中美皆張出又次  
受九江府照磨劉松山子聘側室許出公未卒時  
聞年友吳虞東有子秀慧聘爲贅婿將依以老焉  
及卒虞東遣子承服以成公志越二載族人聚議  
謂公實亢宗昌族而主祀未備何以瞑目九原乃  
推擇公從子希尹爲之後君子曰禮也公斯無憾  
矣銘曰 憲使方伯藩臬之長臬尊威刑藩主惠

義職異道同維明維公公克兼有隨地效忠匪躬  
殉職豈容枉尺彼謾不仁中以蠱螫孰使其然未  
定之天表表風節疇能泯焉

旌德知縣懶樵孫公墓誌銘

浙之平湖有隱君子曰懶樵孫公其諱某其字某  
其行義修於家而化于其鄉鄉之人每愛而師尊  
之歲已巳公年七十有八矣嬰疾弗起數百里之  
內辨查而赴者踵相接也時其子吉甫以監察御史  
稽儲兩廣聞計駭哭如不欲生將匍匐以歸或  
曰士之所遭在君君重在親親重今將君命以有

事其可不終吉甫勉從之既而奉公事狀屬銘續  
石錦雖未識頗熈然交於吉甫義不得辭按狀孫  
世爲汴人隨宋南渡迺家海鹽其判而爲平湖之  
族亦數世矣迄曾大父子文族日蕃以熾大父彥  
忠斥貲佐邊費詔旌義門且加慰勞焉父翼母馬  
氏處鄉黨有惠愛及生公秀拔穎異咸謂天之報  
善果不誣哉孫氏之慶未艾也比少長通葩經及  
戴禮宗人有爲御史者善藻鑒來自燭湖子弟進  
見者數輩莫能當其意及見公欣然曰其亢吾宗  
者乎弱冠有司以萬石長起之公不以爲薄值歲

侵公府誅求無藝公捐所蓄以應費不及民成化  
初海溢墊溺田廬民皆失業州郡觀望莫敢以爲  
言公力請得減稅之半浙西數郡賴以不困女弟  
有孤女方呱呱襁褓中煢然無依躬持以歸購里  
媪乳之及笄爲治裝擇所歸逾於所生嘗有寓客  
某得危疾迎名醫療之百方疾遂愈迨其行驢餽  
甚厚由是義聲騰起吳越間會朝廷懸賞格以勸  
義公獻粟數千不願章服曰趨君父之急固疲太  
義也敢以爲功守令敦諭者再三讓不受士論愈  
高之後吉甫登進去令于旌德供費悉資于家闈

諸孫有能操觚者輒市楮牘遺之曰毋以爲小物而費官也吉甫竟以清節偉行稱部使者采以聞弘治甲子詔封公旌德令吉甫尋擢居內臺明年今上御極推恩公得服御史之服然不以貴自居雖村翁田父必從容相勞苦與之驩如也族子有不率教者公憤之營本源亭于壠次歲時祭享則合其族人而申規勸焉先是未五十時築壽藏有西飛白日如過客北望青山是樂丘之句及將卒預命治歛服葬具洋洋如平時精爽不眩識者以爲達生知命不減古人至四月十有八日竟卒邈

其生則宣德壬子六月十日也配沈氏淑懿有禮  
內外具宜先公十有五年卒贈孺人子男二長達  
娶姜氏陸氏皆先卒次即吉甫名迪持憲有聲娶  
潘氏封孺人女二長適某次適某孫男六綬綬維  
獻岳牧曾孫男五孫女二尚幼公少有志用世既  
付之吉甫遂與世相忘日唯詩篇書卷爲伍而已  
湖山勝致題品殆徧詩家以爲有虞揭之風焉所  
著獨峰樵唱集四卷遺後錄一卷藏于家將以庚  
午歲十二月某日與沈孺人合窆于大易鄉擊壤  
里從卜吉也乃爲之銘曰 世德綿綿汴啓其先

時移事改家隨國遷營殖必競亟走多顛規旋矩  
武我道則然廣播勤藝以冀于天交手相付券而  
取焉鑒畀孔艱孰得其全公既有子而復有年澤  
流祉委如彼源泉謂有不徵視我曾玄嗚呼百世  
之積千載之傳

朱母張氏墓誌銘

敕封孺人張氏故清江提舉封御史玉洲朱先生  
之賢配也先生蚤擅才名韓篇杜筆獨步一時錦  
少同庠校知仰重焉且辛酸嗜合契誼深密以是  
錦之長子縻獲娶先生之女而孺人閨儀壹德聞

之甚悉茲孺人之葬也其季子蟾備列行實泣請  
墓銘質之往時所聞無一語侈誕實應銘法乃因  
其所列而經緯焉孺人出海邑望族高曾咸有德  
譽祖士謙司賦稱平富而能仁者也父經以餉邊  
功授散官耽義樂施鄉人懷之孺人幼有令質孝  
謹明慧言動循矩姻黨嗟異不但父母鍾愛而已  
時玉洲甫成童博綜典籍藻思泉涌諸老儒見之  
閣筆厥考南昌同知蔡軒公大奇之慎選佳配聞  
孺人之賢也促行媒焉散官君喜得才壻一請而  
諾未并喪父哀號之聲人不忍聞里有孝女之



稱及歸玉洲事舅姑懃曲承順善成其歡膳羞縫浣必自手出或憂其煩勞孺人曰此吾舅姑口體所御可諉之他人乎歲時蒸嘗躬事滌濯亦不以役媵御也處娣姒和巽含容未嘗乖忤舅姑深以得婦自慶居亡何南昌公暴疾不起孺人震駭哀悼幾至殞絕姑何宜人衰老齒弱孺人日羞肉糜進之食未竟不敢退旣而何宜人得危疾扶掖盥哺烹調藥餌晝夜無少懈於是里中又稱孝婦焉玉洲名滿四方遠近學者登門執經問字戶外之屨恒滿故家政一委孺人凡錢帛之記注米薪之

劑量宗戚之慶唁問遺處之秩如也玉洲廣交游  
賓客款門無虛日飭治觴俎必適玉洲之心至於  
施槩賑乏急人之危所以佐玉洲於義者恒脫簪  
珥繼之不遺餘力膝前五男子其一孽也教字如  
一仲子豹登丁丑進士兩宰劇邑奉孺人訓以茂  
績聞尋擢監察御史於是孺人有今封然服用約  
素不自高顯雖巷妻里媪必與之抗禮推食解衣  
略無厭怠撫諸子婦慈愛甚篤諸婦化之雍穆無  
間咸有孺人之風焉推誠妾媵視之若女其御婢  
僕則恕不弛義內外截截肅如公庭凡娶嫁五婦

二女營舅姑暨玉洲三喪豐殺中禮無纖髮遺憾  
孺人綜贊之功其可誣耶晚得肺疾繼有仲子之  
哀遂以增劇諸子屢延名醫弗能廖矣將革呼諸  
子至榻前諄諄以光前善後爲屬言畢而瞑時嘉  
靖癸巳之三月二十二日也距生天順癸未五月  
十有九日享年七十有一長男鯉先卒八載矣娶  
張氏次郎豹福州府知府先兩月卒娶沈氏繼蔡  
氏皆封孺人次龍娶趙氏次卽蟾國子生娶談氏  
皆孺人出又次獬亦先卒娶殷氏側室王氏出女  
二長適唐鑾國子生選入內閣誥敕房次適陸時

伊孫男四長宗卿庠生娶戚氏次宏卿聘王氏察  
卿聘唐氏一尚幼孫女五長適謝深次適庠生董  
實大次適喬承慈次納秦鉅聘又次納顧從義聘  
曾孫男一衍孫曾孫女一諸子筮葬日得乙未歲  
之孟冬十八日丙午吉乃奉孺人柩合之玉洲先  
生墓焉嗚呼孺人純德懿行可爲女師可爲世範  
雖詩書所稱殆無以過則夫榮秩高齡令名蕃胤  
孰非所自致耶此可以窺天道矣銘曰 婦王閨  
闔德惟恒貞彼剛而忌乃索之徵猗嗟孺人實涵  
衆美孝慈淑均不妄愠喜夫享高名允維相之永

優仕學際母之遺德必有鄰善亦有報翟翁華巔  
龍蟠紫誥家庭雍雍餘慶攸鍾發祥委祉其來曷  
窮

龍江集卷之八

龍江集卷之九

雲間 唐錦 士綱

墓誌銘

顧景高先生暨配王秦二孺人墓誌銘

維昔景高先生顧君之葬也在正德庚午之春厥配秦孺人命管雙壙閱四十載爲嘉靖己酉孺人乃卒明年庚戌其孤名儒名世卜於臘月廿六日奉孺人柩權厝洋涇祖塋之側須吉納壙以祔君焉先期具事狀詣錦請銘錦與君少同硯席雅相善且世有婣誼銘何可辭按狀君諱嶽景高乃其

字也顧自東晉時姓著吳中元季兵亂君之五世  
祖仲實公始遷海上畱伯子子富於崑守先壠焉  
其三季子曰子貴子榮子華者實從以來子貴於  
君爲高祖曰文彬曰綱則曾祖祖也考懷松翁諱  
瑜慷慨有志節實亢顧宗妣張孺人君自少不習  
兒弄淳謹如成人弱冠受經於玉洲朱先生刻志  
苦心在諸生中獨承器許其奉親夙夜寅恭色養  
無違事伯叔及處羣從咸曲致恩禮庭無間言時  
家苦繁役懷松翁疲於奔命君嘆曰人子當服勞  
以寧親顧牽於浮名耶卽屏鉛槧悉力門戶懷松

賴以稍舒既而邑中疏大姓輸貢京師懷松與焉  
頗以衰暮憚行君奮曰王事父事均我職也毅然  
請代一時同行之家多以縱玩敗產唯君恪慎守  
繩度事克就緒而家亦安堵懷松心獨喜時時稱  
之於人前此有從父生子三日子之母亡懷松爲  
乳抱之獲生長名曰齋有父道焉而君未始以自  
多也然性澹泊無他嗜好唯植德藝善恒恐不及  
鄉稱長者初娶王氏太平守易齋公女生子曰名  
臣王早卒再娶秦氏卽孺人也諱淑英父晉母陳  
並東海鉅族孺人貞淑明慧父授以經史能通其



大義歸君時纔十有七入門而家人相賀舅姑稱  
孝膳羞非手調不敢以進時名臣方孩提孺人亦  
連育子撫鞠顧復如鳴鳩均一雖近戚不知其異  
出也君深以得賢助自慶庚午三月君得危疾再  
旬而革孺人攜諸孤環泣君謂生死常理無足深  
痛唯能奉尊恤孤保持門戶吾瞑目矣孺人聞言  
大慟屢至殞絕勺水不入口者數日舅姑憂駭不  
知所爲泣諭之曰忍忘而夫垂瞑之託乎吾老疇  
依幼孤疇託今日之事從死易不死難耳孺人與  
諸孤皆雨泣久之稍稍進饘粥勉就襄事憾容慘

貌見者側楚懷松素豪爽老尤厭事悉以家政畀  
孺人安享孝養忘其老焉謝世之日呼孺人謝曰  
吾晚景暢適繫爾之力且託孤得人死不朽矣無  
幾張孺人亦卒二喪相繼自含歛以至窆窆皆孺  
人經理無弗整辦時幼孤冥如戶外事若風雨驟  
至凌撼不可支孺人外攘內葺業以復振論者謂  
垂危之祚實孺人再造焉訓飾諸孤嚴甚雖衣食  
細瑣必隨事致誨疾痛輒憂惶罔措語人曰未亡  
人未卽死者以諸孤未成耳方數歲卽遣就學師  
友必一時名勝孺人殷勤館穀不憚勞費躬率女

婢日飭女紅爲薪水之資或脫簪珥以佐束脩諸  
子言動小失雖暮夜必召至榻前反覆詰責凜然  
如嚴師以是名儒名世克自砥礪學行表表有盛  
名士林擬諸郊祁云嘉靖戊子名儒登應天鄉薦  
孺人喜曰吾得藉手下見先夫矣明年名世選補  
弟子員屢魁臺試孺人益喜遂謝家政日唯茹素  
誦經而已然其儉素出於天性不喜錦繡金珠之  
飾雖澣濯之衣亦再紉再綴示諸子婦曰吾服此  
五十年矣其自奉涼菲如此至承賓祭必豐潔誠  
敬不敢委諸人也處妯娌姻戚及御奴僕豐約等

差舉中於義九族式焉出母陳氏繼母楊氏並老  
病卑貧孺人迎致於家爲之生養死葬聞者感歎  
傳爲美談戊申秋孺人嬰疾醫療百方綿歷冬春  
竟不治時二月之十日也垂絕猶呼諸子勗以忠  
孝大節侃侃數言皆烈丈夫所不及也嗚呼賢哉  
是歲有司上孺人貞節於按御史御史具疏以聞  
恩命旦夕當下孺人雖不及見其亦少慰於九原  
矣乎君生於成化丙申二月六日年始三十有五  
嘗以例拜副千戶非其好也孺人生於壬寅五月  
廿又七日享年六十有七子男三卽名臣名儒名

世也名臣娶陸氏名儒娶李氏憲副南原公女繼  
袁氏名世娶郁氏繼張氏女二長適張操次受鄉  
貢士喬誥聘未婚而卒孫男三曰問娶陸氏曰闕  
娶李氏曰聞尚幼孫女八曾孫一嗚呼君與孺人  
並有茂德偉節所以培植於冥冥者甚厚則夫陰  
鑒而默相之者諒不可誣而君乃不年弗獲少試  
於時孺人亦未及大享豈非天固蓄之將大發於  
其後人耶爲之銘曰 顧望於吳肇自典午支于  
海邦由仲實甫仍孫象賢涵泳藝淵幹父用譽學  
以中捐天啓顧宗錫之良偶儆戒相成實維益友

藐茲遺孤育之成之功存再造奚啻父師聯翩鳳  
毛覽輝已兆煌煌寵褒天子有詔霞光雲彩蔭茲  
斧封有萬其古流慶曷窮

誥贈宜人喬氏墓誌銘

嘉靖壬子春太學生董子宜陽纂述所聞爲其前  
妣喬宜人請製墓銘宜人者予同年大理少卿中  
岡先生之元配也卒後十有三載而宜陽始生時  
宜人音容消寂久矣若無所繫情焉而宜陽體念  
先志爲圖不朽雖古之純孝何以加諸矧予忝通  
家其敢以不文爲辭耶按狀喬自前代爲海邑著

姓宜人之曾祖諱彥衡高皇帝時歷鴻臚序班遼府紀善祖諱鎮以醫學顯名父諱紀卒時宜人尚幼遂育于伯兄醫學訓科豫中岡之尊翁侍御公雅與相善且聞其女弟賢因爲仲子委禽焉卽中岡也侍御公謝性方嚴家規肅如宜人執婦禮甚謹得其懽心侍御公歟歷宦途命冢子婦攝家政時妯娌群居不能無異同宜人調停其間卒無間言人以爲難及侍御公謝世中岡尚蹇滯庠校無邊屑屑治生家頗落久之獲舉丙午鄉試而一人無遺尤覺蕭然宜人不少動懷唯加意儉勤拮

据綴葺以佐匱乏而已中岡再試南官試輒北弘  
治壬子乃謀卒業京師携宜人以行越四載丙辰  
遂登上第宜人無驕志無矜容漠然若不知今昔  
之有異也戊午春中岡拜冬官主事分司徐州洪  
宜人隨任時已厲疾舟至河西務疾轉劇是夕中  
岡方就寢恍若見宜人云金蟬脫殼驚起視之目  
已瞑矣宜人素喜閱浮屠書若得悟者故歸化時  
其異若此他如孝經史傳皆所通解尤工筆札嘗  
爲太宜人寫古文一卷亡後太宜人每展卷輒悲  
泣不忍覩云距生景泰癸酉享年四十有六初命



贈安人再贈宜人生二子繼顯繼美皆天女四人  
散官談斗蘭州同知朱平濟寧州判官趙應元其  
壻也其一未嫁卒繼宜人者唐氏實生宜陽文行  
偉卓將益昌中岡未究之業一時士論僉謂中岡  
已且不亡宜人無子而有子矣詎不信然哉宜陽  
泣謂予曰疇昔過庭時每聞先公道前宜人事輒  
慘沮不忍竟其辭時唯趙氏姊存詢之亦然故所  
聞僅此嗚呼據所述是爲宜人不朽矣而又奚疑  
乃爲之銘曰 振衰持盈弗震弗矜洞觀倚伏式  
謹恒貞天監孔邇卒復其始贊相轉旋厥有攸自

既獲乎天而胡弗延人亦有云至壽匪年矧茲賢胤永懷令聞表播遺芳千載爲近

素菴陸公孺人張氏合葬墓誌銘

素菴先生陸公卒于嘉靖甲申正月六日春秋五十有七越二十餘載爲乙巳歲之八月二日其配張孺人亦卒春秋七十有八蓋同生於成化戊子云孺人之卒也其孤標悲哀致毀沉痾不起遺言以弗獲葬母爲恨標之子爚炫輩方斬然縗經中謂父命不可緩也乃以丁未歲之季冬十有三日奉孺人柩權厝長溪塋側諏日啓素菴之封而合

焉預奉晉明姚先生狀問銘于予晉明端士言不  
妄發謹據而書之惟陸氏遠有代序其居華亭馬  
橋鎮諱子順者公之四世祖也曾祖諱德衡家事  
中落乃遷居上海黃浦東之洋涇遂占藉焉祖諱  
璿號筠松德義表表爲鄉邦之望沒後以仲孫文  
裕公深貴贈通議大夫詹事兼翰林學士祖妣贈  
淑人尤氏生五丈夫子其季子號月蓬者公之考  
也妣奚氏<sup>繅</sup>生二男長淮字宗澤次卽素菴公諱  
浙字宗溥生有奇質孝友天至自少苦志績學讀  
書至丙夜不休爲文耻事浮靡典雅明潔深得聖

賢微旨弱冠選補博士弟子臺試恒居優列識者  
許其遠到月蓬樂遠遊久商淮揚間竟卒旅寓公  
悲痛幾殞益奮勵樹立見諸伯叔父皓首霜髯行  
歌桑梓輒嗚咽流涕曰天乎吾父何獨不幸耶與  
宗澤同爨而居相視一體不私貨財豐約共之家  
庭長幼翕然感化人謂張公藝無以過也其宅心  
坦易誠慤終日端坐未嘗有疾聲厲色親之者如  
飲醇曝暄和溫可掬喜談古人言行以寓鑒戒後  
輩莫不竦聽經史之外無他嗜好紛華勢利尤所  
厭鄙從弟文裕公居翰苑有盛名駸駸大用門閥

赫奕公漠然如不知撫冲澹約與寒素士不異徘徊庠校幾四十載雖屢試場屋未獲一薦而當道論德考行必推爲首冠然則公之所以取重於世者豈藉瑣瑣一第哉張孺人同邑友松處士之長女端淑巽順壺德克備月蓬翁旣久商于外而素菴復專志學業家蠱紛全悉孺人贊畫迎見立解靡不曲當平居接物色怡氣平惟恐傷之享廟奉賓必豐必潔至於自奉乃極簡薄然遇婣黨窘乏則欣然出奩中物賙之無靳端有葛覃鷄鳴之風焉文裕公嘗言張嫂賢孝天必報以賢子後育太

學生標孝謹淳篤人謂有天道云子男一卽標娶  
張氏練川東溪君女女二長適庠生張挺部主事  
虹溪之子次適陳道奉化主簿簡齋之子孫男三  
燦庠生娶予孫女炫聘順天通判文洲孫女少子  
郊育於文裕公之子思豫君與以兆嗣孫女三一  
適太學生喬維翰一則子爲仲孫繼陞聘焉一尚  
幼嗚呼昔歐陽子有云爲善無不報而遲速有時  
予觀陸氏之所積累其來甚遠前之所積者旣已  
顯發於文裕公矣後之所積將必有時而發譬猶  
雲旣滂而靈雨必降氣旣至而候虫必鳴公之後

人異時豈無鍾瑞衍澤以迓續寵休者乎爲之銘  
以俟之銘曰 陸望于吳代有名德德聲善韻如  
奏金石集慶發祥青宮玉堂公宗烜赫公安其常  
益裊其身益懋于學十試弗逢一志彌恪壺相克  
良伯諱孟光愈封愈培愈引愈長長溪澄碧永護  
雙壁寶氣鬱丞揚輝無極

工部司務士謙唐公墓誌銘

予兄士謙以弘治甲子季冬十有一日卒于家時  
予承乏東明未知也明年乙丑春三月始克聞訃  
不覺駭哭失聲亟爲位望祭之獨以不能撫柩一

勸爲恨居歲餘家君書諭曰汝兄修禮樂善宜食  
厚報而壽不究於高年位不際於華顯吾哀之惜  
之然恐其死而遂泯泯也將托石以垂不朽小子  
錦其圖之噫錦何忍銘吾兄然有父命不敢不銘  
也公諱銳士謙其字故靈石文獻家洪武初祖諱  
英者監稅烏溪及受代以去遂畱子文祥占籍上  
海於公爲高祖也再傳而祖考衢州知府容軒府  
君累仁飭行族目大以蕃繼而伯考拙菴府君以  
進士起家至都御史家君拜金山衛使文武階聯  
三品鄉黨榮之公少淳雅謝去統綺之習苦志問



學有雋聲弱冠文弟子員校業恒居優等侍母徐夫人疾且再稔朝夕左右殆忘寢食至徒跣迎醫數百里外趾爲之裂弗顧後徐夫人漸殆以死公毀悴骨立見者憐之旣葬廬墓所哀號不絕於是孝聲隱隱動里閭間服闋累試有司不合會有以公工楷書將薦之者公嘆曰吾才豈不若人而試輒敗北謂非命耶且古人隨遇致身要使志行無媿耳豈必科舉哉乃挺身從之 憲宗純皇帝以爲能命待詔仁智殿尋拜工部司務幾二載循例歸省時家君年漸高公專意色養絕意功業矣事

繼母趙夫人能盡孝敬趙夫人愛之逾於所生家庭之間雍雍也處諸弟尤極友愛歲乙卯予忝領鄉薦公操舟抵金陵視之內辰叨甲第公觸暑走京師訓以居官律已之道言猶歷歷在耳顧予庸劣無似寄迹鵷枝將何以爲兄報耶公平生樂恬嗜簡與物無競交友必盡其誠雖有以詐應者亦不較也別墅植木奴千頭故又以橘庄爲號方徜徉泉石娛親教子而大故及矣嗚呼哀哉公生於正統己巳三月十有九日享年僅五十有六耳善而弗壽予於是益歎夫天者之難必也娶山氏理

家有法妾郁氏宋氏子男四長數娶大行郁君希  
正之姪次稷次敷後公歲餘天次歆女三長適汀  
州知府陸公之孫軒次適顧棟次適顧冕俱庠生  
孫男一繼恩尚幼將以丁卯正月十日葬于徐夫  
人墓之側從上吉也銘曰 穹山深淵兮舞蛟躍  
虎名宗世閥兮英賢之府東吳衣冠兮唐以甲稱  
委祉于公兮委質俟俟翱翔文苑兮遭數之奇逐  
隊而登兮慙爲噲伍翩然來歸兮萊斑舞庭脫屣  
軒裳兮厥志孔武施而未獲兮真宰何私收效於  
後兮繩繩莫數泣望新阡兮紈紉無由遠將心淚

兮漬綿墳土

士重唐君墓誌銘

予兄士重既卒之明年家君爲營葬事舉緇有日  
然卞璞未售厥美弗彰錦恐其遂將漚滅漸盡而  
無聞也私竊悲之昔子由銘其兄東坡之墓君子  
不以爲僭因含哀撰次以勒諸墓門之石庶其有  
可恃以不朽云君諱鎰士重其字也先爲晉陽人  
洪武初高祖監稅于上海因家焉大父容軒府君  
以先伯中丞公貴封衢州知府家君成化間拜金  
山衛使不樂於官尋抗疏以休而孺人張氏則君

之生母也君幼穎敏絕倫六歲能屬對間出奇語  
族黨異之咸謂且元吾宗既長工舉子業知名於  
部使者召充邑庠弟子員每就試筆勢駛疾若懸  
江河儕輩望風而避莫敢與爲敵時場屋文字以  
剽竊爲富以纖綺爲妍君力洗其陋腴澤粹好姿  
態橫生長老之以科目擅聲價者反媿之其於義  
理尤能翻研精繹不蹈襲故常必以己意所到爲  
是自謂高科顯第可執契而取也壬子應鄉試不  
利乙卯戊午再試再北識者以君爲屈辛酉槐期  
方逼而疾已革矣絕塵之足蹶于中途嗚呼惜哉

夫非材不良非時不用而二子者不能待夫時豪傑之士往往憤慨激欲歸其咎於天以君之才而困鬱偃蹇卒窮以死謂非造物者之罪乎其平居頗負氣自信不爲利撓勢偃每談論風采逸發諤諤不阿能使貴者色沮佞者魄褫然剛褊少容觸物輒弦急霆震故與世多迂忌嫉者恒居半焉不旋踵已春融冰釋煦然相忘無絲髮凝蓄始之嫉而忌者或反翕然悅以服矣夫豈血氣爲之使哉孟軻氏有云我善養吾浩然之氣欲知君者其於此求之君生於天順壬午七月七日卒於弘治

辛酉七月之晦享年四十配陸氏先卒繼謝氏次  
王氏子男五徽徽旻致重壽女三長嫁士族周盛  
時餘皆幼以十二月庚申厝于廟涇六壠之側嗚  
呼士方齟齬未遇時固無以自異於庸人幸而都  
顯位建事功重勲累爵史不勝書者滔滔皆是也  
予兄勞形竭志於場屋間幾二十年勤苦不怠震  
耀通顯豈其所難哉不幸而終不能沾升斗之祿  
樹尺寸之功使操筆者遂無以紀此錦之所爲吞  
聲扼腕而繼之以慟也嗚呼悲夫銘曰孰畀其  
材孰使其窮浩然之氣集義所充廣步高視莫敢

彌鋒孰不震顯而君不逢孰不壽考獨迎其凶豈  
堅則驟折而剛者難容嗚呼已矣是宜作銘以壽  
于幽宮

唐孺人徐氏墓誌銘

孺人徐氏予先兄徵仕郎浙江布政司都事恕齋  
府君之次室姪太學生袞之母也祖某父某世居  
東海之濱以耕織爲業孺人生有令質淑慧閑婉  
父母愛異焉及笄而歸恕齋府君事府君暨嫡余  
孺人祇慎迎承克有順德恒佐余孺人供蒸嘗具  
賓饌必潔必豐罔敢怠忽余孺人彌愛之中饋之



事一以相委豐約隆殺允協情理雖脯鹽菓祿之細處之靡不適宜族之談內職者歸焉連產三子皆天一女適士族最後得袞孱弱多疾孺人抱持保護不離于懷嫡母余孺人三子三女皆長於袞而愛袞唯均袞年十四余孺人卒踰年府君亦卒袞旣幼且孤筑筑在疚家事悉總於孺人時強奴黥僕或相凌忽孺人不以介懷內則躬率羣婢紡績不輟外則分委童僕耕藝唯時一錢尺帛率手操心記而節縮之以是業用不墜爲袞聘延名師則豐其幣餼無所靳惜策勵誦習每至夜分慈而

不縱蓋兼有父道焉府君無恙時爲袞聘王氏石  
溪別駕之女也至是袞長當娶巨細無備獨力營  
辦奉迎予妣太安人于堂凡婚禮所須咨稟而行  
無弗中度人稱知禮後袞學業日進臺試優等薦  
送應試選入庠校每與儕友結文會聚講孺人喜  
溢顏面日爲擊鮮治具罔有怠容嘉靖乙未例許  
庠校士進補國學孺人謂袞曰吾聞成均四海英  
才所萃汝宜際此恩例以廣見聞毋蹙蹙局此恐  
負汝先君之志矣力雖不逮吾當爲汝黽勉圖之  
及袞登國學往來兩都凡家費行資悉出孺人經

畫袞弗與知仰成而已袞獲志顯業就騫騰可與  
孺人之功也初袞既娶父未有子孺人命袞夫婦  
抱予幼孫繼勲爲子予長子中書參之第四子也  
未幾袞連舉二子曰繼賢曰繼 孺人喜甚謂繼  
勲若爲之兆云嘉靖壬寅歲孺人遘疾頗危袞徧  
延名醫療治百端沉綿久之忽加眩掉格塞遂成  
不治垂絕猶計慮家事疊疊不絕口神爽如平時  
復抱袞泣曰汝孽子宜堅忍力學毋隕厥志吾將  
持此以報汝先君於地下矣言畢嗚咽而逝是歲  
之五月廿又三日也距生成化乙巳三月七日享

年五十有八嗚呼孺人爲袞立家則極拮据之勞  
欲袞志學則任督勵之勞幸皆有成矣然勞而弗  
享此袞之所以銜痛入骨悲號悽惻而不能自己  
也茲袞卜以乙巳歲之某月某日祔孺人於恕齋  
府君之墓先期具事狀詣予拜且泣曰內言不出  
唯吾母處家訓子之詳非吾季父其孰知之袞旣  
未能顯揚吾母以報罔極而又不圖所以明著母  
德則不明不孝罪惡滋深其何顏以偷生於天壤  
間乎唯吾季父哀而賜銘以紓袞痛以塞袞無涯  
之悲焉予哀其志不忍辭也乃爲之銘銘曰 易

唐君墓誌銘  
稱家人女治平內禮著內則厥義斯備維孺人賢  
內職克虔服勤服勤以酬所天既贊乃家復才其  
子昌祚發祥興復其始有美玄堂廟涇之旁尚百  
千年永固其藏

亡姪世學唐君墓誌銘

嗚呼吾姪世學乃遽至於斯耶夫耳順之年亦足  
云壽然以世學君之孝友博愛耽義樂善則天之  
所以報世學者宜不止此豈非死生定數誠有莫  
得而逃者耶嗚呼悲哉君諱敦世學其字別號雲  
東先考刑部郎中質菴府君之長孫先兄工部司

務橘庄府君之冢嗣也自少倜儻爽異卓有立志  
少予三載羈中時與予同就外傳挾策相隨若昆  
季然稍長益通敏解事殊有老成之風時橘庄府  
君暨諸叔皆從事宦學刑部府君或委以家政凡  
所料理悉犁然當於人心刑部府君鍾愛之未幾  
橘庄謝世君泣血悲哀自屬纊以至終喪無一違  
禮事毋山孺人怡顏順志曲盡愛敬鄉黨稱孝焉  
時兩弟稷敵皆幼君延師訓誨甚有恩義稷遂以  
文學知名登壬午京闈鄉薦捷音至君躍然喜曰  
異時可藉此以見吾父地下矣君雖簪纓世家而

自奉儉約居常布素與白屋士不殊然敦重友誼  
賓朋至未嘗不款留必極豐腆告以匱乏輒傾囊  
不靳蓋終其身無變也奉化庠生嚴君嘗館君家  
忽遭危疾君迎醫致禱不遺餘力及卒躬爲棺歛  
復厚賻歸其喪且時時附致以贍其家人尤以爲  
難其拯卹危窘如此類甚衆蒙德者不獨一嚴君  
也嘉靖丁酉春二月偶爲風襲噤不能語諸子延  
醫療治久之始能言至六月六日疾復作屢更醫  
不能奏功竟以朮又七日卒于正寢鄉閭聞訃  
匍匐赴哭者纍纍而至數日不絕於此亦可以見君

之平生矣君生成化戊戌二月二十三日享年六十初娶郁氏潮州郡守直齋公之兄女靜專孝謹女德純備賢而不壽予嘗銘以哀之繼娶吳氏太僕卿吳公之裔孫均慈淑慧克相其夫生於弘治庚戌五月十有四日卒於嘉靖癸巳正月四日享年四十有四子男三長繼恩郁出由邑庠生登于太學累試場屋娶贈兵部主事簡軒張公之孫女次繼芳習舉子業今策名太學娶名族陳氏又次繼志初聘貴州副憲南原李公之女卒繼聘鴻臚寺丞吳公之女一女適庠生孫應奎皆吳出孫男



五國華國章國許國瑞國本孫女三長納福州郡  
守青岡朱公之子察卿聘餘尚幼諸子以君卒之  
又明年己亥仲冬四日丁酉奉柩攢厝于廟涇北  
原祖壠之側俟吉窆焉予爲之銘曰 顯顯華族  
不炫綺縟夔夔孝恭鄉閭所宗好施樂濟所急者  
義安分守身允保其真厥培旣渥遺祐斯篤視厥  
後人何其振振書香奕世雖死不逝祖兮父兮茲  
焉永依

亡姪世載夫婦合葬墓誌銘

吾唐氏遠有代序雖蔓衍四方而皆以晉昌爲所

自出其居霍州之靈石者尤晉昌之近派也 國  
初大使府君自靈石來爲上海稅官長子贅於縣  
主簿李從吉氏因著籍爲上海人再傳爲吾祖封  
衢州知府容軒府君衢州生先考質庵府君封刑  
部郎中鴻德駿望大江以南所同尊而共恭焉其  
第四子恕齋府君諱鎔浙江布政司都事子之兄  
也文學行誼冠冕士林配余孺人賢明慈孝婦德  
備焉都事府君四子文爲之長世載乃其字也天  
性謹厚而明達過人雖貴宦家絕無紈綺之態刑  
部府君雅鍾愛之稍長習舉子業能自刻厲屢更

名師業有端緒尋選入邑庠遂升太學博覽勤誦  
期與天下造士角藝較能以自表見會都事府君  
歷事南都因畱佐家政初疑其少未練習然劑量  
經畫無不脗合時宜僮僕慎戢堂室潔清至於庀  
置器物亦必各有規式衆乃異之以爲能家後余  
孺人久疾世載內候安否親湯藥外侍都事府君  
承咨詢奉溫清矻矻終日未嘗告勤人又以爲能  
子子繼科漸長卽以所業經授之且誡之曰此吾  
唐氏所世守也汝業之無怠必期於成庶無忝先  
世耳旦夕程律恩不弛義則又以爲能父及父母

襄事訖益務砥礪奮然欲發舒蘊負効用於時而  
大故及矣嗚呼惜哉時嘉靖癸巳之季冬十二日  
也距生弘治戊申三月十二日年四十有六娶同  
邑姚氏太學生淮之女嚴重端慤不妄笑怒平生  
無僞言飭行閫中鉅細疾徐處之當理舅姑以下  
咸稱之後爲主母獨總家政年踰四十未嘗輕降  
堂序僕御罕得見其面也夫卒之明年六月十九  
日忽得風眩疾不能言逾日亦卒其生成化丁未  
十月廿又一日年四十有八子男一卽繼科娶王  
氏女一適庠生郁恪孫男二長國英聘顧氏次國

秀孫女一尚幼繼科上以嘉靖乙未歲之蜡月十  
有六日合窆二柩於廟涇祖壠之側先期詣予泣  
拜請題墓隧之石嗚呼志鬱而弗伸才閤而弗試  
自古豪傑之士恒以之扼腕而長嗟豈獨世載抱  
斯憾哉雖然善祥德慶不干其身必于子孫世載  
宜以此瞑目矣銘曰 不辱以承其先不享以畀  
諸後源遠流長匪壽而壽全哉同歸夫夫婦婦莫  
茲玄堂其寧其久

亡兒唐儼墓誌銘

嗚呼此龍江居士唐錦士綱葬其仲子儼之墓錦

志行不穀多獲戾於神明故天降酷虐以顯示殛  
罰而遂以累吾子也嗚呼痛其甚耶先是丙辰歲  
予以進士竊祿于朝明年丁巳春三月十有一日  
生仲子於城西僦舍請名於家君以予登第而得  
也命曰重恩六歲就里學始更今名兒生有奇相  
京師王相士者術妙天下予召使視之驚曰是兒  
河爲目海爲口方面濶輔風神秀朗天庭聳而玄  
珠朝海法當魁天下又驗之日亦云巳年得辰月  
與時蛇爲龍之象言與相者符予亦以其姿稟之  
異也信之不疑又明年予謁告歸省乃携以南見

者嘖嘖咸謂唐氏後且益大然孝愛出於天性警  
慧不類常兒四五歲卽嗜讀書口授不數過輒默  
誦如流嘗病痢告其乳者曰勿使吾母知知之必  
阻吾學且疑重寡言對賓客終日端坐無怠容揖  
讓周旋動有禮度老成人不能過也壬戌十二月  
疹後得疾竟以十有四日死嗚呼天果不欲昌吾  
唐氏耶何不使吾兒少延以掀播其奇偉於天下  
也祥麟威鳳家國之寶相奪之速何以爲情予與  
妻陸氏哭之傷心拊膺幾絕越九日乃葬于廟涇  
先壠之傍遂銜哀濡血以誌諸石銘曰 曷從而

生葛從而死神駒來西跬步千里遭途嶮巖數武而止魂氣何之骨肉在此於千萬年其永無圯

季子重壽權厝誌銘

予有季子曰重壽以弘治甲子八月廿有六日生於家時予待次京師未知也十月予乃有東明之命明年乙丑春三月季子隨其母至東明肌肉玉雪眉目如畫摘眼爲之心醉家君亦以書來曰是兒風骨英特門祚有托矣其善撫之予佩服之唯謹逾數月竟以不習水土瘡發於脇療之百方莫能神迄正德丙寅四月十有八日乃死嗚呼予



將何以復命於家君耶予少寡寗情自丙辰登第  
後侍親九載志固安焉何乃不自貴重隨時躁出  
遂至詘辱惡土以累吾子而東明之政又復怠荒  
悖繆招罰於天以流禍至此上慙命於父下媿累  
於子予亦何用生爲也越三日巳亥權殯于城南  
風雲壇左俟予歸與之俱焉灑血書石用告知我  
哀者俾勿壞銘曰 氏爲唐字爲壽質清潤金莫  
購性靈竒期肯構水土災事乃繆殯城南石以侑  
渺雲山痼而疚

龍江集卷之九